
МИЛЛАТЛАРАРО ДЎСТЛИК ВА ТОТУВЛИКНИ МУСТАҲКАМЛАШГА ҲИССА ҚЎШАЁТГАН ФАРҒОНАЛИКЛАРГА ДАВЛАТ МУКОФОТЛАРИ ВА КЎКРАК НИШОНЛАРИ ТОПШИРИЛДИ

Президентимиз Шавкат Мирзиёев ташаббуси билан мамлакатимизда илк мартаба жорий йилнинг 30 июль санасида Халқлар дўстлиги куни кенг нишонланди. Ушбу миллатлараро дўстлик ва тотувлик байрами муносабати билан қабул қилинган Президент фармонида кўра, бир гуруҳ юртдошларимиз давлат мукофотлари ва кўкрак нишонлари билан тақдирландилар.

Бугун вилоят ҳокимлиги қабуллар уйида ана шу мукофотларни фарғоналик эгаларига топшириш маросими бўлиб ўтди.

Унда Ўзбекистон Республикаси Вазирлар Маҳкамаси ҳузуридаги Миллатлараро муносабатлар ва хорижий мамлакатлар билан дўстлик алоқалари қўмитаси раиси Рустамбек Қурбанов, вилоят ҳокимининг ўринбосари Жамшед Хатамов ҳамда вилоятимизда фаолият олиб бораётган миллий-маданий марказлар вакиллари қатнашдилар.

Сўз олганлар давлатимиз раҳбари томонидан миллатлараро тотувлик муносабатларига кўрсатилаётган эътибор, амалга оширилаётган ишлар ҳақида тўхталиб ўтдилар.

- Вилоятимизда 8 та немис, славян, яҳудий, татар, қирғиз, корейс, тожик, турк миллий маданий марказлари бор. Улар учун вилоят марказида “Дўстлик уйи” ташкил қилиниб, зарур жиҳозлар билан таъминланди. Жойларда барча миллатлар вакиллари аҳл-иноқликда яшаб, турли йўналишларда меҳнат қилиб юртимиз равнақига муносиб ҳиссаларини қўшиб келишмоқда, - деди Жамшед Хатамов.

Шундан сўнг кўтаринки кайфиятда мукофотларни ўз эгаларига топшириш жараёнлари бошланди. Фарғона вилояти рус миллий маданий маркази раиси Ақопджанова Галина Алексеевнага “Меҳнат шуҳрати” ордени, Сўх туманидаги “Сариканда” маҳалла фуқаролар йиғини раиси Сафоев Баҳодир Акпаралиевичга “Шуҳрат” медали тақдим этилди.

Бундан ташқари ижтимоий-сиёсий ҳаётнинг турли жабҳаларида меҳнат қилаётган яна 10 нафар фарғоналиклар “Халқлар дўстлиги” кўкрак нишонлари билан тақдирландилар.

Миллий маданий марказлар раҳбарларига “Ўзбекистон умумий уйимиз” китоби ва “Ўзбекистон” журналларининг махсус сонлари ҳам топширилди.

Бизни ижтимоий тармоқларда кузатинг [Facebook](#),
2021-08-04 08:49:22